

# Kerjasama Pusat bantu capai misi Johor Maju

Oleh **KHAIRUL MOHD. ALI**  
utusannews@mediamulia.com.my

**JOHOR BAHRU:** Kerajaan Negeri Johor berharap kerjasama erat dengan kerajaan Persekutuan pimpinan Perdana Menteri, Datuk Seri Anwar Ibrahim dapat menyelesaikan beberapa masalah legasi dihadapi sejak sekian lama.

Menteri Besar, Datuk Onn Hafiz Ghazi berkata, kerajaan Persekutuan maklum dengan beberapa isu yang membelenggu rakyat negeri ini sejak sekian lama.

Menurutnya, kerjasama erat kedua-dua pihak berupaya membantu Johor merealisasikan hasrat menjadi sebuah negeri maju menjelang 2030.

"Saya telah menzahirkan setinggi-tinggi penghargaan ke-

pada Perdana Menteri atas keprihatinan beliau dan kerajaan Persekutuan terhadap beberapa isu utama yang membelenggu Johor.

"Permasalahan itu adalah seperti masalah banjir, jalan raya, hospital dan kesesakan di Kompleks Imigresen, Kastam dan Kuarantin (CIQ) Bangunan Sultan Iskandar (BSI) dan Kompleks Sultan Abu Bakar (KSAB)," katanya dalam satu kenyataan selepas mengadakan pertemuan bersama Perdana Menteri di Putrajaya, semalam.

Tambah Onn Hafiz, kerajaan negeri juga menghargai bantuan diberi kerajaan Persekutuan di bawah Belanjawan 2023 Malaysia Madani.

"Semoga hubungan baik ini dapat diterjemahkan sehingga Johor mampu menjadi negeri

maju menjelang 2030," ujarnya.

Sementara itu, Anwar berkata, antara perkara dibincangkan termasuklah perincian soal penyelarasan melibatkan tatakelola dan peruntukan berhubung pembangunan dan ekonomi negeri Johor.

"Turut ditekankan bantuan pasca banjir bagi golongan petani, penternak dan nelayan; serta isu penyelenggaraan dan pembaikan rumah-rumah pangsa melebihi 40 tahun," katanya dalam satu hantaran di Facebook, semalam.

Perdana Menteri turut memberitahu, perancangan diatur kedua-dua pihak penting bagi memastikan pengurusan dan pelaksanaan projek memberi dampak yang menyeluruh buat rakyat khususnya di Johor dan negara jiran.



**ONN Hafiz Ghani menunjukkan buku Maju Johor kepada Anwar Ibrahim ketika mengadakan pertemuan bersama Perdana Menteri di Putrajaya, semalam.**